

PROF. MADYA DATO' ARIF PERKASA  
DR. MOHD ASRI BIN ZAINUL ABIDIN

# HADITH PALSU

KESAN NEGATIF  
TERHADAP IMEJ ISLAM



PROF. MADYA DATO' ARIF PERKASA  
DR. MOHD ASRI BIN ZAINUL ABIDIN

# HADITH PALSU

KESAN NEGATIF  
TERHADAP IMEJ ISLAM



# KANDUNGAN

PENDAHULUAN	6
PENGENALAN HADITH MAUDU'	7
NAS-NAS LARANGAN HADITH PALSU	13
HUKUM MENYEBAR HADITH MAUDHU'	16
KEPENTINGAN MENGENALI SANAD	21
<b>KESAN-KESAN NEGATIF HADITH PALSU TERHADAP IMEJ ISLAM</b>	
Merosakkan Aqidah Murni	24
Menjatuhkan Nilai Kewibawaan Agama	25
Menjadikan Nas-Nas Islam Bercanggahan	28
Menjadikan Hadith Bercanggahan Dengan Realiti Dan Akal Yang Waras	36
Punca Percambahan Pemikiran Sesat	39
Memundurkan Dan Menyusahkan Urusan Umat Islam	45
Menjatuhkan Imej Tokoh-Tokoh Umat	50
Memalingkan Manusia Daripada Sunnah Yang Sahih	52
Menghilangkan Ketulenan Agama	57
PENUTUP	60
SUMBER RUJUKAN	61

## **PENDAHULUAN**

Buku ringkas ini membincangkan tentang hadith palsu dan beberapa kesan negatifnya. Hujah-hujah logik dan dalil syarak dikemukakan bagi penjelasan pengharaman haram sama ada mencipta atau menyebarkannya.

Seterusnya kesan-kesan negatif hadith palsu terhadap imej Islam dinyatakan beserta beberapa contoh sebagai pembuktian atau bahan perbincangan.

Tujuannya bagi mengelakkan golongan agamawan terutamanya, bersikap ambil mudah dalam penyebaran hadith tanpa terlebih dahulu mengetahui status hadith-hadith tersebut.

## **HADITH MAUDU'**

**الحديث الموضع**

## **MAKSUD HADITH MAUDU'**

Sesuatu yang dikaitkan dengan Nabi s.a.w. sama ada perkataan, atau perbuatan atau pengakuan, atau sifat diri dan akhlak maka ia disebut sebagai *al-hadith*.

Namun menyandarkan sesuatu kepada Nabi s.a.w. secara dusta, bukanlah hadith pada hakikatnya, cuma ianya dipanggil hadith berdasar apa yang didakwa oleh perekanya dan ditambah dengan perkataan *al-Maudu'*, atau *al-Mukhtalaq* المخلاق atau *al-Masnu'* المصنوع iaitu palsu, atau rekaan atau yang dibuat.

Maka hadith palsu ialah: “Hadith yang disandarkan kepada Nabi s.a.w secara dusta, sedangkan ia tiada hubungan dengan Nabi s.a.w.”<sup>1</sup>.

## HADITH MAUDU' PADA NILAIAN AKAL

Membuat hadith palsu bererti mencemarkan ketulenan agama. Pencemaran terhadap ketulenan agama membawa kepada natijah yang meruntuhkan agama. Berdusta atas nama RasululLah s.a.w adalah diharamkan berdasarkan dalil-dalil al-Quran dan al-Sunnah seperti yang akan disebutkan. Bahkan logik akal juga membantah pendustaan ini atas banyak sebab. Antara sebab yang utama adalah seperti berikut:

- i. Jika pendustaan menggunakan nama orang biasa diharamkan, apatah lagi menggunakan nama seorang rasul. Pendusta hadith palsu menyamakan rekaannya dengan wahyu, atau nilai kerasulan yang ada pada diri Nabi Muhammad s.a.w.

---

<sup>1</sup> lihat: Nur al-Din 'Itr, *Manhaj al-Naqd fi 'Ulum al-Hadith*, m.s.301

- ii. Pendustaan atas nama Nabi s.a.w. menghilangkan kehebatan dan keaslian agama. Agama yang hilang keasliannya, tiada nilainya lagi. Ia menyebabkan Islam yang bersumberkan wahyu sama seperti agama rekaan yang bersumberkan pemikiran dan khayalan manusia.
- iii. Pendustaan atas nama Nabi s.a.w. bererti penipuan terhadap pencinta Islam yang akan mempercayai pendustaan itu. Mereka akan mengamalkan pendustaan itu dengan keyakinan ia tuntutan agama, padahal ia kepalsuan. Sedangkan mereka inginkan keaslian.
- iv. Pendustaan atas nama Nabi s.a.w. adalah pengkhianatan terhadap syariat yang diturunkan. Jika pendustaan itu mempunyai unsur-unsur jahat, maka ia sejenis jenayah yang menyebabkan manusia hilang keyakinan dan memandang serong terhadap agama, atau menyebabkan manusia mengamalkan agama dalam bentuk yang salah.
- v. Jika pendustaan itu menokok tambah unsur-unsur yang dianggap baik, pendusta

seakan menganggap agama yang diturunkan Allah belum lengkap, justeru memerlukan nas-nas tambahan dan rekaan.

Agama yang tulen ialah agama yang bersumberkan wahyu. Hanyalah Islam yang dibawa oleh Nabi Muhammad s.a.w yang diyakini ketulenan sumbernya dari langit. Adapun selain Islam, agama-agama itu diambil dari cetusan fikiran dan khayalan para pengasas atau penditanya. Tiada nilai kewahyuan (*divinity*) dalam ajaran mereka. Adapun agama-agama Ahl al-Kitab rosak disebabkan pengubahan dan tokok tambah yang mereka lakukan.

Hadith-hadith palsu membawa ke arah penghakisan ketulenan agama. Agama rekaan tiada nilai kedaulatannya. Petikan dalam tulisan al-Syeikh Jamal al-Din al-Qasimi (w. 1322H) menyebut:

*"Di sana ada tujuan para imam hadith menerangkan tentang sanad dan kelemahannya, yang lebih besar dari tujuan menggalakkan ibadah, puasa dan solat. Iaitu untuk membebaskan dan memelihara syariat yang suci dari*

sebarang penambahan. Sama ada penambahan yang baik atau yang buruk. Ini kerana jika dibuka ruang untuk hadith dusta dengan niat yang baik, bererti dibuka juga untuk niat yang buruk. Apakah lagi keburukan yang lebih besar yang akan masuk ke dalam syariat yang suci ini disebabkan dibuka ruang untuk para pendusta mencipta apa sahaja yang mereka suka?!! Tanpa dibezaikan antara yang benar dan bohong. Kemudian pula, siapakah yang sanggup untuk digunakan namanya oleh para penulis untuk mereka menulis apa yang mereka sukai mengenai pemikiran atau perkataannya, sekalipun ia baik?!! Siapakah pula yang dapat menerima untuk seseorang berdusta menggunakan nama menteri atau ketua dengan mengeluarkan suatu ketetapan atau edaran bersama dengan tanda tangannya?!! Tanpa menganggapnya mempersendakan undang-undang dan wajib didenda, atau sekurang-kurang dibantah?!! Siapakah pula yang dapat membayangkan bahawa dia dapat

*mengada-adakan suatu perintah tertinggi dan mengedarkannya seakan dari sultan, namun dia tidak dihukum?!! Jika demikian siapa pula muslim yang dibenarkan untuk berdusta kepada Rasulullah?!!<sup>2</sup>*

---

2 Al-Qasimi, *Qawa'id al-Tahdith*, m.s. 165.

## NAS-NAS LARANGAN HADITH PALSU

Justeru nas-nas al-Quran dan al-Sunnah mengharamkan hal ini:

Firman Allah dalam Surah al-An'am 144:

فَمَنْ أَظْلَمُ مِمَّنِ افْتَرَى عَلَى اللَّهِ كَذِبًا لِيُضِلَّ  
النَّاسَ بِغَيْرِ عِلْمٍ إِنَّ اللَّهَ لَا يَهْدِي الْقَوْمَ  
الظَّالِمِينَ

(maksudnya) Maka, siapakah yang lebih zalim daripada orang yang berdusta terhadap Allah untuk menyesatkan manusia dengan tidak berdasarkan ilmu pengetahuan? Sesungguhnya Allah tidak memberi petunjuk kepada kaum yang zalim.

Firman Allah dalam Surah al-'Araf 33:

قُلْ إِنَّمَا حَرَّمَ رَبِّيُّ الْفَوَاحِشَ مَا ظَهَرَ مِنْهَا وَمَا  
بَطَنَ وَإِلَّا ثُمَّ وَالْبَعْيَ بِغَيْرِ الْحَقِّ وَأَنْ تُشْرِكُوا بِاللَّهِ  
مَا لَمْ يُنَزِّلْ بِهِ سُلْطَانًا وَأَنْ تَقُولُوا عَلَى اللَّهِ مَا لَا  
تَعْلَمُونَ

(maksudnya) Katakanlah: "Sesungguhnya Tuhanmu hanya mengharamkan perbuatan-perbuatan yang keji, sama ada yang nyata atau yang tersembunyi; dan perbuatan dosa; dan perbuatan menceroboh dengan tidak ada alasan Yang benar; dan (diharamkanNya) kamu mempersekuatkan Allah dengan apa yang Allah tidak menurunkan sebarang bukti (yang membenarkannya); dan (diharamkanNya) kamu memperkatakan terhadap Allah sesuatu yang kamu tidak mengetahuinya.

Nabi s.a.w bersabda:

إِنَّ كَذِبًا عَلَيَّ لَيْسَ كَكَذِبٍ عَلَى أَحَدٍ مِنْ كَذَبٍ  
عَلَيَّ مُتَعَمِّدًا فَلَيَتَبَوَّأْ مَقْعَدَهُ مِنَ النَّارِ<sup>3</sup>

(maksudnya) "Sesungguhnya berdusta ke atasku (menggunakan namaku) bukanlah seperti berdusta ke atas orang lain (menggunakan nama orang lain). Sesiapa yang berdusta ke atasku dengan sengaja, maka siaplah tempat duduknya dalam neraka".

Hadith ini adalah mutawatir<sup>4</sup>.

3 Riwayatkan al-Bukhari 1/439, Muslim 1/10.

4 lihat: Ibn al-Salah, 'Ulum al-Hadith, m.s. 239.

Dalam riwayat yang lain Nabi s.a.w. menyebut:

لَا تَكْذِبُوا عَلَيَّ فَإِنَّهُ مَنْ كَذَبَ عَلَيَّ فَلْيَلِجْ النَّارَ<sup>5</sup>

"Jangan kamu berdusta ke atasku, sesiapa berdusta ke atasku maka dia masuk neraka"

Kata al-Hafiz<sup>6</sup> Ibn Hajar al-`Asqalani (meninggal 852H) dalam mengulas hadith ini:

"Ia mengenai setiap pendusta ke atas Nabi s.a.w. dan semua jenis pendustaan ke atas baginda. Maksudnya: Jangan kamu sandarkan pendustaan ke atasku (menggunakan namaku)<sup>7</sup>.

Bahkan baginda S.A.W. menyebut:

---

5 Riwayat al-Bukhari 1/52 dan Muslim 1/10.

6 Di dalam ilmu hadith, gelaran *al-Hafiz* الحافظ ini diberikan kepada sesiapa yang begitu luas pengetahuannya dalam hadith dan seni ilmunya, sehingga apa yang dia ketahui mengenai hadith-hadith dan kecacatan-kecacatannya lebih banyak dari apa yang dia tidak ketahui. *Huffaz* adalah kata jama' (kata banyak iaitu pada jumlah tiga dan ke atas) bagi perkataan *hafiz*. Jadi *huffaz* di dalam bahasa melayu ialah *hafiz-hafiz hadith*.

7 Ibn Hajar al-`Asqalani, *Fath al-Bari*, 1/270.

يَكُونُ فِي آخِرِ الرَّمَانِ دَجَالُونَ كَذَّابُونَ يَأْتُونَكُمْ  
مِنَ الْأَحَادِيثِ بِمَا لَمْ تَسْمَعُوا أَنْتُمْ وَلَا آبَاؤُكُمْ  
فَإِيَّاُكُمْ وَإِيَّاهُمْ لَا يُضِلُّونَكُمْ وَلَا يَقْتِنُونَكُمْ<sup>8</sup>

(maksudnya): Pada akhir zaman akan ada para dajjal lagi pendusta. Mereka membawa kepada kamu hadith-hadith yang tidak pernah kamu dan bapa-bapa kamu mendengarnya. Kamu hendaklah berhati-hati dengan mereka agar mereka tidak menyesatkan kamu dan memfitnah kamu (menipu kamu sehingga yang batil disangkakan benar).

### Hukum Menyebar Hadith Maudu'

Penyebaran hadith palsu bermaksud menjadikan hadith tersebut didengari atau dibaca oleh orang lain. Hal ini sama ada menerusi ucapan atau tulisan.

Dari segi syariat Islam, bukan sahaja membuat hadith palsu itu haram, bahkan menyebarkannya kepada orang lain tanpa diterangkan bahawa ia adalah hadith palsu adalah sesuatu yang haram. Kata al-Imam Ibn al-Salah (meninggal 643H):

8 Riwayat Muslim 1/12.

*"Tidak halal kepada sesiapa yang mengetahui ianya hadith palsu meriwayatkannya dalam apa bentuk sekalipun, melainkan disertai dengan menerangkan kepalsuannya"*<sup>9</sup>.

Maka wajar berhati-hati dalam masalah ini. Ini kerana hadith adalah agama dan pegangan yang menjadi hujah kita di akhirat kelak. Adalah suatu kebodohan seseorang mengambil fakta yang palsu untuk dijadikan hujah di mahkamah Allah Yang Maha Adil lagi Maha Mengetahui. Dalam kebanyakan keadaan hujah-hujah palsu tidak dapat mempertahan seseorang di mahkamah dunia, apakah hujah dan dalil palsu dapat membela seseorang di mahkamah akhirat kelak?!!

Demikian penyebar hadith palsu sama ada menerusi ucapan atau tulisan, dalam masa yang sama sebenarnya menipu orang lain apabila menyandar sesuatu perkara kepada Nabi s.a.w tanpa bukti yang sah. Pendengar akan terpedaya lalu mengamalkan perkara yang dianggapnya daripada Nabi s.a.w , sedang ianya bukan seperti yang disangkakan. Al-Imam Ibn Hibban (w. 354H) **ابن حبان** dalam sahihnya meletakkan satu fasal yang beliau namakan:

---

<sup>9</sup> Ibn al-Salah, *'Ulum al-Hadith*, m.s.98

فصل: ذكر إيجاب دخول النار لمن نسب  
الشيء إلى المصطفى صلى الله عليه وسلم وهو  
غير عالم بصحته<sup>10</sup>

(Fasal menyebut ketetapan memasuki neraka untuk sesiapa yang menyandarkan sesuatu kepada al-Mustafa (Nabi Muhammad) s.a.w, sedangkan dia tidak tahu mengenai kesahihannya).

Kata al-Syeikh Muhammad bin Muhammad Abu Syahbah: "Tidak halal meriwayatkan hadith palsu dalam apa perkara sekali pun, melainkan bersama keterangan tentang kepalsuannya. Ini sama ada berkaitan halal dan haram, atau *fadail* (kelebihan-kelebihan amalan), atau *al-tarhib* (menakutkan orang ramai terhadap maksiat) dan *al-targhib* (menggalakkan ibadah), atau kisah, atau sejarah atau selainnya. Sesiapa yang meriwayatkan tanpa keterangan bererti telah melakukan dosa yang besar dan termasuk dalam senarai pendusta. Ini berasaskan apa yang diriwayatkan oleh al-Imam Muslim dalam *muqaddimah* sahihnya, bahawa Rasulullah s.a.w bersabda:

---

10 Ibn Hibban, Sahih Ibn Hibban, 1/210.

مَنْ حَدَّثَ عَنِّي بِحَدِيثٍ يُرَى أَنَّهُ كَذِبٌ فَهُوَ أَحَدُ  
الْكَاذِبِينَ

Maksudnya: Sesiapa yang menyebut hadith daripadaku sedangkan dia menyangka ia dusta, maka dia termasuk salah seorang pendusta.

Ramai ulama hadith telah menghukum dengan *ta'zir* (denda) dan *takdib* (hukuman membetulkan akhlak) ke atas sesiapa yang meriwayatkan hadith palsu tanpa diterangkan kepalsuannya. Kata Abu 'Abbas al-Sarraj: Aku melihat diberikan kepada Muhammad bin Isma'il al-Bukhari surat Ibn Karram yang bertanyakan beberapa hadith, antaranya: hadith daripada al-Zuhri, daripada Salim, daripada ayahnya –disandarkan kepada Rasulullah:

الإيمان لا يزيد ولا ينقص

Maksudnya: Iman itu tidak bertambah dan tidak berkurang

Maka al-Imam al-Bukhari menulis di atas surat tersebut:

Sesiapa yang menyebut hadith ini maka wajib dipukul dengan keras dan dipenjara

dalam tempoh yang lama. Bahkan dalam kalangan ulama ada yang berlebihan ke tahap menghalalkan darahnya. Maka, ketika disebutkan hadith Suwaid al-Anbari :

من عشق وعف وكتم ثم مات شهيدا

(Sesiapa yang jatuh cinta, lalu dia menahan diri dan menyembunyikannya, kemudian mati, maka dia mati syahid), lalu Yahya bin Ma'in berkata: "Darah orang ini halal" <sup>11</sup>

Ketika ditanya Ibn Hajar al-Haitami mengenai seorang khatib yang menaiki mimbar setiap Jumaat dan meriwayatkan hadith-hadith tanpa diterangkan sumber dan kedudukannya, maka jawabnya:

"Hadith-hadith yang dia sebut tanpa menerangkan perawi dan siapa yang menyebutnya, harus dengan syarat dia seorang yang mempunyai ilmu dalam hadith, atau dia memetik daripada kitab yang penulisnya ahli hadith<sup>12</sup>. Adapun jika dia hanya bergantung kepada kitab atau

---

<sup>11</sup> Abu Syahbah, *al-Wasit fi `Ulum wa al-Mustalah al-Hadith*, m.s. 321-322

<sup>12</sup> Maksudnya dia berkemampuan menilai kedudukan riwayat-riwayat yang dia baca.

*ucapan yang penulisnya bukan ahli hadith, maka tidak halal (berbuat demikian). Sesiapa yang melakukannya hendaklah dia dita'zirkan (dihukum) dengan keras. Inilah keadaan kebanyakan khatib<sup>13</sup>. Mereka semata-mata hanya melihat khutbah yang mengandungi hadith-hadith, lalu mereka pun hafal. Mereka berkhutbah menggunakan hadith-hadith tersebut tanpa mengetahui asal-usulnya. Maka wajib ke atas pemerintah di setiap negeri menghalang para khatib dari berbuat demikian”<sup>14</sup>*

### **Kepentingan Mengenali Sanad**

Maka pentingnya mengenali ilmu hadith khasnya masalah *sanad*. *Sanad* adalah rangkaian para perawi (periwayat atau pembawa riwayat) yang menghubungkan kepada sesuatu ungkapan. Sama ada ianya adalah ungkapan Nabi s.a.w. atau selain baginda. Mengkaji *sanad* bererti mengkaji sejauh manakah kesinambungan sesuatu riwayat

---

13 Ibn Hajar al-Haitami menyebut keadaan ini di zamannya.

14 Ibn Hajar al-Haitami, al-Fatawa al-Hadithiyyah, m.s. 32.

daripada seorang perawi kepada perawi yang lain sehingga kepada pengucapnya, dan dalam masa yang sama mengkaji latar belakang para perawi. Di samping beberapa aspek yang lain yang diambil berat oleh para pengkaji hadith atau riwayat adalah sangat penting. Kata `Abd Allah bin al-Mubarak :

الإسناد من الدين لو لا الإسناد لقال من شاء :  
ما شاء<sup>15</sup>

*"Sanad itu adalah sebahagian dari al-Din, kalaularah tidak kerana sanad sesiapa pun akan bercakap apa sahaja yang dia mahu"*

Justeru itu jika kita bukan ahli dalam bidang hadith, kita hendaklah merujuk kepada mereka yang mengetahui selok belok hadith. Kata al-Syu'aib al-Arnaut شعيب الأرناؤوط: Sesungguh seorang ulama hadith Syam, Badr al-Din al-Hasani telah berkata:

*"Tidak harus mensandarkan sesebuah hadith kepada Rasulullah s.a.w. kecuali apabila dinyatakan kesahihannya oleh salah seorang huffaz<sup>16</sup> yang dikenali.*

---

15 Riwayat Muslim 1/10.

16 Lihat nota sebelum ini berhubung dengan maksud al-Hafiz.

Sesiapa yang berkata: "Rasulullah telah bersabda" sedangkan dia tidak tahu kesahihan hadith tersebut menerusi salah seorang huffaz, dibimbangi dia termasuk dalam hadith "Sesiapa yang berdusta ke atasku apa yang aku tidak ucapkan, maka siaplah tempat duduknya dalam neraka"<sup>17</sup>.

---

17 Syu`aib al-Arnaut, nota kaki tahqiq *Siyar A'lam al-Nubala*, 19/340.

## Kesan-Kesan Negatif Hadith Palsu Terhadap Imej Islam

Banyak kesan-kesan negatif dari penyebaran hadith palsu. Jika hadith palsu tidak dibendung, imej Islam yang murni dan berwibawa akan rosak. Antara kesan negatif tersebut:

### 1. Merosakkan Aqidah Yang Murni

Hadith-hadith palsu sebahagiannya direka oleh golongan anti-Islam pada zaman dahulu. Unsur-unsur yang dimasukkan ke dalamnya ialah unsur-unsur yang mencemarkan agama. Antara yang menjadi fokus mereka adalah dalam masalah akidah. Unsur dan perkara yang merosakkan akidah yang murni dimasukkan ke hadith-hadith palsu ini. Kata Ibn Jauzi (w. 597H):

*"Puak zindiq telah memasukkan ke dalam hadith-hadith mengenai sifat Allah berbagai perkara dengan tujuan memalukan Islam dan memasukkan syak ke dalam jiwa kaum muslimin"<sup>18</sup>.*

---

18 Ibn Jauzi, *Al-Maudu'at* 1/127.

Antara contohnya:

لَوْ أَحْسَنْتُهُمْ بِحَجْرٍ لَنْفَعَهُ

Maksudnya : Jika seseorang kamu berbaik sangka dengan batu, nescaya ia akan memberi manfaat kepadanya.

Kata Ibn Qayyim al-Jauziyyah (w. 751H):

"Ia dari pemalsuan golongan musyrik yang menyembah berhala"<sup>19</sup>.

Di sana berbagai hadith yang direka oleh golongan zindiq yang matannya merosakkan akidah.

## 2. Menjatuhkan Nilai Kewibawaan Agama

Secara umumnya, kesemua hadith palsu menjatuhkan nilai ketinggian Islam. Ini kerana mereka menjadikan Islam sebagai bahan sendaan dan rekaan mereka semata. Ini apabila mereka menyamakan rekaan mereka dengan wahyu yang sebenar. Sesuatu yang bersumberkan wahyu

<sup>19</sup> Ibn Qayyim al-Jauziyyah, *al-Manar al-Munif fi al-Sa-hih wa al-Da'if*, m.s 139.

mempunyai kewibawaannya yang tersendiri. Mana mungkin untuk diletakkan setanding dengan rekaan manusia, sekalipun kelihatan menarik.

Namun lebih dari itu, sebahagian hadith-hadith palsu ini pada zahirnya pun sudah tampak jelas kebodohan inti kandungannya. Hadith-hadith ini disebut di bawah pelbagai tajuk sebelum dan selepas ini. Sebagai contoh di sini, hadith palsu berikut:

من صلی الصھی کذا وکذا رکعة أعطی ثواب  
سبعين نبیا

*Maksudnya : Sesiapa yang bersolat duha sekian dan sekian rakaat, maka diberi pahala sebanyak tujuh puluh nabi.*

Hadith-hadith yang seperti ini menjatuh nilai ketinggian para nabi. Seakan amalan dan pengorbanan para nabi begitu lekeh, hanya dapat ditandingi dengan beberapa rakaat solat sahaja. Justeru al-Hafiz Ibn Qayyim (w. 751H) ketika mengulas hadith ini menyebut:

*"Seakan pendusta yang keji ini tidak mengetahui bahawa selain nabi, sekalipun bersolat selama umur Nabi Nuh a.s. tidak*

*diberikan pahala setanding seorang nabi pun*<sup>20</sup>.

Hadith ini boleh menyebabkan manusia meninggalkan amalan-amalan Islam yang lain disebabkan keyakinan pahalanya sudah menyamai pahala para nabi dan pastinya dia ahli syurga.

Antara hadith palsu lain:

الديك الأبيض صديقي وصديق صديقي وعدوه  
عدوي وعدو عدو

*Maksudnya : Ayam jantan putih adalah kawanku, ia juga kawan kepada kawan ku. Musuh ayam jantan putih adalah musuhku dan musuh kepada musuhku.*

Hadith palsu ini kelihatan sangat lekeh dan menghina Rasulullah. Tidak mungkin keluar dari mulut seorang nabi perkara yang sebegini. Mungkin ia direka oleh penggemar ayam jantan putih. Sebenarnya, semua hadith yang berkaitan dengan kelebihan ayam jantan putih adalah tidak thabit sama sekali<sup>21</sup>.

---

20 Ibid, m.s. 50.

21 Lihat: al-Jarahi, *Kasyf al-Khafa*, 2/422.

Dalam masyarakat kita ada kesan hadith palsu ini. Sesetengah kepercayaan mempercayai kelebihan ayam jantan putih.

### 3. Menjadikan Nas-Nas Islam Bercanggahan

Oleh kerana inti kandungan hadith palsu tidak dari sumber yang sama iaitu diri rasul yang diwahyukan, maka sering kali hadith-hadith palsu itu menyanggahi kandungan al-Quran dan al-Sunnah. Ini akan mencemarkan Islam dan memberi ruang kepada musuh mendakwa Islam sebagai ajaran yang kontradik antara satu sama lain. Apatah lagi pada zaman ini, di mana penulis-penulis Barat dan Pro-Barat sentiasa mencari peluang yang seperti itu.

Justeru, al-Imam Ibn Jauzi menyebut (w. 597H):

إذا رأيت الحديث يبادر بالمعقول أو يخالف المنقول أو ينافق الأصول فاعلم أنه موضوع<sup>22</sup>

*Apabila engkau melihat sesebuah hadith menyanggahi logik, menyalahi manqul (al-Quran) dan bertentangan dengan usul-usul Islam, maka ketahui ia hadith yang palsu.*

22 Al-Sayuti, *Tadrib al-Rawi*, m.s. 182.

Kata Dr. al-Syeikh Muhammad bin Muhammad Abu Syahbah: "Sepertimana para ulama hadith mengambil berat berhubung analisa kritis terhadap sanad yang merupakan analisa kritis luaran, mereka juga membuat analisa kritis terhadap matan (textual criticism) iaitu analisa kritis dalaman.

Ini terbukti dengan mereka menjadikan salah satu tanda-tanda hadith palsu ialah percanggahannya dengan *al-`aql* (akal), atau *al-musyahadat* المشاهدة (apa yang disaksi di alam kenyataan), atau *al-hiss* الحس (apa yang dikesan oleh pancaindera) sedangkan ia tidak mampu untuk ditakwilkan dengan takwilan yang hampir dan mungkin<sup>23</sup>.

Dalam banyak keadaan mereka maksudkan ialah percanggahan dengan al-Quran, atau al-Sunnah yang masyhur lagi sahih, atau sejarah yang diketahui, sedangkan ianya tidak mampu untuk ditaufiqkan (diselaraskan)<sup>24</sup>.

Sebagai contohnya riwayat palsu yang menyanggahi al-Quran:

وَلَدُ الزِّنَا لَا يَدْخُلُ الْجَنَّةَ

---

23 Maksudnya percanggahan tersebut tidak dapat dibuat sebarang tafsiran yang memboleh untuk kita menerimanya sebagai satu kemungkinan.

24 Abu Syahbah, *Difa' An al-Sunnah*, m.s. 31.

Maksudnya : Anak zina tidak akan masuk syurga.

Riwayat ini secara terang menyanggahi al-Quran iaitu dalam Surah al-Isra ayat 15:

مَنِ آهَتَدَى فَإِنَّمَا يَهْتَدِي لِنَفْسِهِ وَمَنْ ضَلَّ فَإِنَّمَا يَضِلُّ  
عَلَيْهَا وَلَا تَرْزُقُ وَازِرَةً وَرَزْرَ أَخْرَى وَمَا كُنَّا مُعَذِّبِينَ حَتَّى  
نَبْعَثَ رَسُولًا

Maksudnya : Sesiapa yang beroleh hidayah, maka sesungguhnya (faedah) petunjuk itu hanya (kembali) kepada dirinya sendiri, dan sesiapa yang sesat maka sesungguhnya (keburukan) kesesatannya hanya ditanggung oleh dirinya juga, **dan seseorang yang boleh memikul tidak akan memikul dosa perbuatan orang lain** dan tidaklah Kami mengazabkan sesiapapun sebelum Kami mengutuskan seorang rasul.”

Mana mungkin anak zina dihukum disebabkan perbuatan kedua ibu bapanya?!. Ini mencemarkan penegasan al-Quran tentang keadilan Allah yang tidak menghukum seseorang atas kesalahan orang lain.

Demikian juga mana-mana hadith yang menyebut tarikh hari kiamat, maka ia adalah hadith dusta. Ini kerana bercanggah dengan nas al-Quran dalam Surah al-A'raf 187:

يَسْأَلُونَكَ عَنِ الْسَّاعَةِ أَيَّانَ مُرْسَلَهَا قُلْ إِنَّمَا  
عِلْمُهَا عِنْدَ رَبِّي لَا يُجَلِّيهَا لِوَقْتِهَا إِلَّا هُوَ ثَقِيلٌ فِي  
الْأَسْمَاءِ وَالْأَرْضِ لَا تَأْتِيكُمْ إِلَّا بَعْثَةٌ يَسْأَلُونَكَ  
كَانَكَ حَفِيْظٌ عَنْهَا قُلْ إِنَّمَا عِلْمُهَا عِنْدَ اللَّهِ وَلَكِنَّ  
أَكْثَرَ النَّاسِ لَا يَعْلَمُونَ ٧٨١

Terjemahan : "Mereka bertanya kepadamu (wahai Muhammad) tentang hari kiamat: "Bilakah masa datangnya?" Katakanlah: "Sesungguhnya pengetahuan mengenainya hanyalah ada di sisi Tuhanmu, tidak ada sesiapa pun yang dapat menerangkan kedatangannya pada waktunya melainkan Dia."

Kata Dr. Hammam Sa'id:

"Di sana ada perkara yang telah diputuskan al-Quran, maka ianya menjadi perkara yang jelas diketahui dalam agama (معلومة من الدين بالضرورة) waktu berlakunya kiamat. Al-Quran telah menetapkan bahawa

waktu kiamat disembunyi dari sekelian makhluk. Firman Allah –beliau menyebut ayat di atas-, jika ada sesebuah hadith yang menyebut kiamat dan tarikhnya, maka ia adalah hadith yang dusta menyanggah nas al-Quran yang jelas”<sup>25</sup>.

Demikian juga hadith palsu yang menyebut:

إِذَا جَامَعَ أَحَدُكُمْ زَوْجَتَهُ أَوْ جَارِيَتَهُ فَلَا يَنْظُرْ إِلَى  
فَرْجَهَا فَإِنْ ذَلِكَ يُورِثُ الْعَمَى

Maksudnya : Apabila seseorang kamu menyebutuhi isteri atau jariahnya, maka jangan dia melihat pada kemaluan mereka, kerana yang demikian itu menyebabkan buta.

Hadith ini palsu seperti yang dinyatakan dan akui oleh beberapa pengkaji hadith termasuk Ibn Jauzi<sup>26</sup> (meninggal 597H), Ibn Hajar al-‘Asqalani<sup>27</sup> (852H), al-Sayuti<sup>28</sup> (911H), al-Albani<sup>29</sup> dan lain-lain. Ia menyusahkan pasangan suami isteri.

25 Hammam, Sa'id, *Al-Tamhid fi 'Ulum al-Hadith*, m.s. 141.

26 Lihat: Ibn Jauzi, *Al-Maudu'at*, 2/271,

27 Lihat: Ibn Hajar al-‘Asqalani, *Al-Talkhis al-Habir fi Takhrij Ahadith al-Rafi'i al-Kabir*, 3/316.

28 Lihat: Al-Sayuti, *al-Lali al-Masnu'ah fi al-Ahadith al-Maudu'ah*, 2/144.

29 Lihat: Al-Albani, *Silsilah al-Ahadith al-Da'ifah wa al-Maudu'ah*, 1/353

Bahkan melarangkan apa yang telah Allah halalkan dalam nas al-Quran. Ini seperti mana firman Allah pada permulaan Surah al-Mukminun:

قَدْ أَفْلَحَ اللَّهُمَّ نِعْمَنَ (١) الَّذِينَ هُمْ فِي صَلَاتِهِمْ  
خَشِعُونَ (٢) وَالَّذِينَ هُمْ عَنِ الْلَّغْوِ مُعْرِضُونَ  
(٣) وَالَّذِينَ هُمْ لِلزَّكُوْةِ فَاعْلَوْنَ (٤) وَالَّذِينَ هُمْ  
لِفُرُوجِهِمْ حَفِظُونَ (٥) إِلَّا عَلَىٰ أَزْوَاجِهِمْ أَوْ مَا  
مَلَكُتُ أَيْمَانُهُمْ فَإِنَّهُمْ غَيْرُ مَلُومِينَ (٦)

Maksudnya : Sesungguhnya berjayalah orang-orang yang beriman iaitu mereka yang khusyuk dalam sembahyangnya. Dan mereka yang menjauhkan diri dari perbuatan dan perkataan yang sia-sia; Dan mereka yang berusaha membersihkan hartanya (dengan menunaikan zakat harta itu); Dan mereka yang menjaga kehormatannya, -Kecuali kepada isterinya atau hamba sahayanya maka sesungguhnya mereka tidak tercela.

Kata al-Albani r.h “Penilaian yang betul akan menunjukkan kebatilan hadith ini. Ini kerana dari segi persetubuhan, pengharaman melihat faraj isteri bererti pengharaman kepada wasail (faktor-faktor

ke arah persetubuhan). Jika ALLAH menghalalkan suami menyetubuhi isterinya, apakah logik untuk dia dilarang melihat kemaluan isterinya. Demi sesungguhnya tidak! Ini dibuktikan dengan apa yang diriwayatkan daripada ‘Aisyah, katanya:

كُنْتُ أَغْتَسِلُ أَنَا وَرَسُولُ اللَّهِ صَلَّى اللَّهُ عَلَيْهِ وَسَلَّمَ مِنْ إِنَاءِ بَيْنِي وَبَيْنَهُ وَاحِدٌ فَيُبَادِرُنِي حَتَّى أَقُولَ دَعْ لِي دَعْ لِي

(Aku dan Rasulullah pernah mandi bersama dari satu bekas air. Maka dia mendahuluiku sehingga aku kata: tinggalkan untukku! tinggalkan untukku!).

Riwayat al-Bukhari, Muslim dan selain mereka.

Jelas dari hadith ini harus melihat kemaluan isteri. Ini dikuatkan oleh riwayat Ibn Hibban melalui Sulaiman bin Musa yang apabila ditanya mengenai suami yang melihat kemaluan isterinya, dia menjawab:

“Aku pernah bertanya hal ini kepada ‘Ata. Kata ‘Ata aku pernah bertanya ‘Aisyah, lalu ‘Aisyah pun meriwayatkan hadith di atas”<sup>30</sup>.

---

30 Al-Albani, *Silsilah al-Ahadith al-Da’ifah wa al-*

Contoh menyanggahi prinsip-prinsip Islam; hadith-hadith yang menyatakan orang yang bernama Muhammad atau Ahmad tidak akan masuk neraka. Ini bercanggah dengan prinsip Islam bahawa syurga dan neraka dinilai melalui amalan soleh. Ahli syurga adalah golongan yang beriman dan soleh. Sementara neraka dimasukkan ke dalamnya ahli maksiat walau apa nama dan panggilannya.

Kata Ibn Qayyim al-Jauziyyah:

*"Ini bercanggahan dengan apa yang diketahui dari agama Nabi s.a.w iaitu; bahawa neraka tidak dapat dielakkan darinya dengan nama dan gelaran. Sebaliknya, yang menyelamatkan dari neraka ialah iman dan amalan soleh"<sup>31</sup>.*

Hadith-hadith palsu ini menjadikan Islam seakan bercanggahan antara satu sama lain. Ia mencemarkan keselarasan agama ini.

---

Maudu'ah, 1/353

31 Ibn Qayyim al-Jauziyyah, *al-Manar al-Munif fi al-Sahih wa al-Da'if*, m.s. 57.

#### **4. Menjadikan Hadith Bercanggahan Dengan Realiti Dan Akal Yang Waras**

Kebanyakan hadith-hadith palsu ini direka oleh golongan yang akalnya dikuasai oleh perasaan dan emosi tanpa berfikir. Justeru kita mendapati mereka kadang-kala dalam membuat rekaan-rekaan ini tidak berfikir panjang dan menilai dengan teliti sehingga inti rekaan mereka kelihatan begitu bodoh. Antara contohnya:

إِنْ سَفِينَةً نُوحَ طَافَتْ بِالْبَيْتِ سَبْعَاً وَصَلَتْ  
الْمَقَامَ رَكْعَتِينَ

*"Sesungguhnya bahtera Nuh telah tawaf Ka'bah sebanyak tujuh kali dan solat dua rakaat di makam Ibrahim".*

Ini adalah hadith palsu. Termasuk yang menempelak riwayat ini al-Imam al-Syafi'i<sup>32</sup> r.h. Tidak masuk akal sama sekali. Nuh a.s. wujud sebelum Ibrahim a.s.. Di mana kaabah dan makamnya ketika itu?. Para pembaca akan melihat bantahan para ulama hadith terhadap riwayat ini di dalam pelbagai kitab ilmu hadith<sup>33</sup>.

<sup>32</sup> Lihat: Ibn 'Adi al-Jurjani, *Al-Kamil fi Du'afaa al-Rijal* 4/270.

<sup>33</sup> Lihat: Al-Sayuti, *Tadrib al-Rawi*, m.s.182.

Contoh lain ialah rekaan mereka mengenai terung:

البازنجان لما أكل له

*Maksudnya : Terung itu mengikut hajat ia dimakan.*

Maksud hadith palsu ini ialah seseorang yang memakan terung akan memperolehi hajat atau tujuan ia memakan terung tersebut. Jika dia makan kerana inginkan kesembuhan, maka penyakitnya akan sembuh. Jika dia memakannya kerana ingin menjadi berilmu maka dia akan berilmu. Demikian seterusnya. Ini ditiru dari hadith yang sah mengenai air zam-zam, dimana baginda bersabda:

مَاءُ زَمْزَمَ لِمَا شُرِبَ لَهُ

*Maksudnya : Air zam-zam itu mengikut tujuan ia diminum*

Lalu pemalsu hadith mencipta hadith palsu sebelum ini dengan diganti air zam-zam dengan terung.

## البازنجان شفاء من كل داء

Maksudnya : Terung itu ubat untuk segala penyakit.

Kata al-Imam Ibn Qayyim al-Jauziyyah (w 751H) :

*"Semoga Allah menghodohkan pereka kedua hadith di atas. Perkara seperti ini jika disebut oleh orang yang paling pakar dalam perubatan pun, orang ramai akan mentertawakannya. Jika dimakan terung untuk demam panas, kemurungan dan banyak penyakit lain, ia hanya menambahkan keburukan lagi. Jika orang fakir makan agar kaya, dia tidak akan kaya. Jika orang jahil makan untuk pandai, dia tidak akan pandai"*<sup>34</sup>.

Hadith-hadith palsu menjatuh nilaiyan agama yang sentiasa seiras dengan realiti dan fakta. Banyak lagi hadith-hadith palsu sebegini terutamanya yang berkait dengan jenis-jenis ubat. Tujuan pereka hadith sebegini mugkin untuk komersial seperti melaris barang mereka.

---

34 Ibn Qayyim al-Jauziyyah, *al-Manar al-Munif fi al-Sahih wa al-Da'if*, m.s. 51.

## 5. Punca Percambahan Pemikiran Sesat

Banyak hadith palsu diwujudkan demi menyokong aliran yang sesat seperti Syiah, Murjiah, golongan tarekat yang menyeleweng.

Golongan Syiah adalah puak yang paling terkenal mencipta hadith-hadith berhubungan dengan kelebihan ‘Ali dan Ahli Bait. Antara contohnya hadith:

من سره أن يحيا حياتي ويموت مماتي ويسكن  
جنة عدن غرسها ربى فليوال عليا من بعدي  
وليوال وليه وليقتد بالأئمة من بعدي فإنهم  
عترتي خلقوا من طينتي رزقوا فهمي وعلمي  
وويل للمكذبين بفضلهم من أمتي للقاطعين  
فيهم صلتي لا أنالهم الله شفاعتي<sup>35</sup>

Maksudnya : Sesiapa yang suka hidup seperti hidupku, mati seperti matiku dan dia tinggal di syurga ‘Adn yang ditanam oleh Tuhanaku maka hendaklah dia mengangkat ‘Ali selepasku. Juga mengangkat

---

35 Riwayat Ibn Abi Nu‘aim, *Hilyah al-Auliyyaa*, 1/86.

penggantinya. Hendaklah dia mengikut para imam selepasku, kerana sesungguhnya mereka adalah kaum keluargaku, diciptakan daripada asal-usulku, direzekikan kefahaman dan ilmu. Celakalah golongan umatku yang membantah kelebihan mereka dan memutuskan hubungan denganku. Semoga Allah tidak memberikan mereka syafaatku.

Ini adalah hadith palsu, sanadnya gelap, kesemua para perawinya tidak dikenali dengan pasti kecuali seorang iaitu Ibn Abi Rawwad ابن أبي رَوَاد. Selainnya nama-nama para perawi tidak pernah disebut oleh para ulama *al-Jarh wa al-Ta'dil*.<sup>36</sup>

Hadith yang seperti ini hanya bertujuan mengembangkan pemikiran Syiah dalam politik dan akidah. Akibat dari tidak memahami disiplin ilmu hadith menyebabkan ramai yang termakan dengan umpan seperti ini dan akhirnya terheret ke dalam kancang Syiah.

Contoh lain hadith musalsal berikut;

---

36 Lihat: Nasir al-Din al-Albani, *Silsilah al-Ahadith al-Da'ifah wa al-Maudu'ah*, 2/298-299.

# من صافحني أو صافح من صافحني إلى يوم القيمة دخل الجنة<sup>37</sup>

Maksudnya : "Sesiapa yang berjabat tangan denganku, atau dengan orang yang berjabat tangan denganku sehingga hari kiamat maka dia masuk syurga".

Berdasarkan hadith palsu ini, setiap yang terpengaruh dengannya akan berjabat tangan dengan guru mereka dengan dakwaan kononnya tangan tersebut telah berjabat dengan tangan sebelumnya secara berangkaian sehingga kepada Nabi s.a.w.

Hadith ini datang melalui jalan al-Muàmmar المعمّر atau dibaca juga dengan al-Ma'mar<sup>38</sup> yang didakwa sebagai seorang sahabah yang mengambil hadith ini daripada Nabi s.a.w. Dia

37 Hadith palsu ini dikenali *al-Musalsal bi al-Musafahah* المسالسة بالمسافحة iaitu hadith musalsal berjabat tangan. Secara umumnya *musalsal* bermaksud setiap periyat sesuatu hadith meniru perbuatan seperti mana yang diriwayatkan kepadanya oleh rawi sebelumnya sehingga kepada Rasulullah s.a.w. Kebanyakan hadith *musalsal* adalah tidak sahih bahkan palsu. Kata al-Imam al-Dhahabi (meninggal 848H): "Secara umumnya hadith-hadith musalsal adalah dhaif, kebanyakannya pula adalah batil, disebabkan pembohongan perawinya" (*al-Dhahabi, al-Muqizah fi 'ilm al-Mustalah al-Hadith*, m.s. 44)

38 Al-Imam al-Dhahabi teragak-agak untuk meletakkan baris dalam menyebut namanya. (lihat: Ibn Hajar al-'Asqalani, *al-Isabah*, 6/207)

tidak pernah tersenarai dalam bilangan sahabah Nabi S.A.W. Tiada siapa pernah meriwayatkan daripadanya pada zaman sahabah dan tabiin. Dia tidak pernah dikenali hanyalah setelah kurun kelima. Dia adalah seorang pendusta atau peribadi yang tidak pernah wujud. Kata al-Imam Ibn Hajar al-Asqalani (w. 852H) dalam *Lisan al-Mizan*:

*"Riwayat berjabat tangan Mu`ammar tidak akan diterima oleh orang yang berakal"*<sup>39</sup>

Mereka yang sedar telah mengingatkan tentang pembohongan hadith ini di dalam kitab-kitab hadith. 'Abd al-Fattah Abu Ghuddah juga dalam tahqiqnya bagi kitab *Zafar al-Amani* ظفر الأمانی turut mengakui kepalsuan hadith, katanya:

*"Hadith musalsal berjabat tangan tersebut adalah batil dan dusta. Tiada asal dan tidak pernah wujud"*

Katanya juga:

*"Tiada keberkatan bagi pendustaan dan pembohongan (hadith ini) ke atas Nabi s.a.w. tidak dikira ibadat menulis cerita dongeng ini melainkan dengan niat untuk*

---

<sup>39</sup> Ibn Hajar al-`Asqalani, *Lisan al-Mizan*, 6/ 68.

*memusnahkannya*<sup>40</sup>. Beliau memetik fatwa al-Imam al-Sayuti (w. 911H) bila ditanya mengenai hadith Mu`ammar, beliau berkata: “Mu`ammar adalah pendusta lagi dajjal, hadithnya adalah batil, tidak halal meriwayatkannya. Sesiapa yang melakukan demikian (meriwayat hadith palsu tersebut) termasuk dalam sabda Nabi s.a.w: “sesiapa berdusta ke atasku maka siap tempat duduknya dalam neraka”<sup>41</sup>.

Kandungan hadith palsu seperti ini hanya untuk menaikkan seseorang supaya orang menganggap ianya hebat, berjabat tangan denganannya seperti berjabat tangan dengan Nabi s.a.w. dan akan masuk syurga.

Ini adalah satu perkara yang bahaya. Apakah mungkin hanya berjabat dengan seseorang guru sama dengan berjabat tangan dengan Nabi s.a.w. dan masuk syurga?. Para sahabah tidak pernah mendakwa berjabat tangan dengan mereka menyebabkan seseorang masuk syurga. Apatah lagi mereka tidak pernah mengadakan majlis mengambil ijazah berjabat tangan dengan mereka.

---

40 m.s. 273.

41 Ibid 275.

Golongan yang mempopularkan hadith palsu ini semata untuk mengaut keuntungan dari masyarakat agar orang ramai mengagungkan mereka. Seakan-akan mereka adalah pintu bagi syurga. Perkara seperti inilah yang menjadi permulaan kepada sikap *al-ghulu* iaitu berlebih-lebih dalam menghormati guru, atau syeikh. Akhirnya akan menjadikan para pengikut mengikut semua yang diperintah dan disuruh secara membabi buta atas nama agama.

Inilah yang telah berlaku kepada golongan tarikat yang menyeleweng yang menyatakan:

*"Jadikanlah dirimu di hadapan gurumu seperti mayat di hadapan orang yang memandikannya".*

Dalam erti kata lain buatlah apa yang gurukehendaki tanpa sebarang penilaian dan bantahan. Agama tidak mengajar taklid yang sebuta ini. Bahkan agama meminta agar semua perkara ditegakkan di atas hujah dan dalil. Firman Allah dalam Surah al-Isra' ayat 38 :

وَلَا تَقْفُ مَا لَيْسَ لَكَ بِهِ عِلْمٌ إِنَّ الْسَّمْعَ وَالْبَصَرَ  
وَالْفُؤَادَ كُلُّ أُولَئِكَ كَانَ عَنْهُ مَسْؤُلًا

*Maksudnya : "Jangan kamu ikuti apa yang kamu tiada pengetahuan mengenainya. Sesungguhnya pendengaran, penglihatan dan hati, semuanya akan dipersoalkan."*

## **6. Memundurkan Dan Menyusahkan Urusan Umat Islam**

Hadith-hadith palsu ini juga memberikan kesan yang buruk kepada cara fikir dan sikap umat Islam. Nilai-nilai kezuhudan yang melampau, atau unsur-unsur khurafat dan kepercayaan yang tidak berasas yang dimuatkan dalamnya boleh merosak mentaliti dan sikap mereka yang mempercayainya.

Antaranya hadith yang diriwayatkan oleh Musnad Ahmad dan selainnya yang menyatakan sahabat Nabi s.a.w. iaitu 'Abd al-Rahman bin 'Auf yang merupakan seorang dari sepuluh yang mendapat khabar gembira jaminan syurga akan memasuki syurga secara merangkak disebabkan kekayaannya yang merupakan seorang pedagang.

عَنْ عَائِشَةَ: سَمِعْتُ رَسُولَ اللَّهِ صَلَّى اللَّهُ عَلَيْهِ  
وَسَلَّمَ يَقُولُ: قَدْ رَأَيْتُ عَبْدَ الرَّحْمَنَ بْنَ عَوْفٍ  
يَدْخُلُ الْجَنَّةَ حَبْوًا

*Daripada Aishah: Aku mendengar Rasulullah s.a.w bersabda: "Aku melihat 'Abd al-Rahman bin 'Auf memasuki syurga secara merangkak"*

Ini adalah hadith yang palsu. Kata Ibn Jauzi (meninggal 597H): "Kata Ahmad bin Hanbal: Hadith ini dusta dan munkar"<sup>42</sup>. Al-Syaukani (meninggal 1250H) juga mengulas hadith ini dengan memetik kata-kata al-Imam Ahmad bahawa hadith ini dusta dan munkar<sup>43</sup>. Demikian 'Abd al-Rahman al-Hut menilai hadith ini sebagai palsu dengan menyebut:

مَوْضُوعٌ، رَوَاهُ الْإِمَامُ أَخْمَدُ فِي مُسْنَدِهِ، وَهُوَ  
مَعْدُودٌ مِنْ عَدَّةِ أَحَادِيثٍ فِي مُسْنَدِهِ لَيْسَ لَهَا  
أُصْلٌ، وَكُلُّ مَنْ رَوَاهُ بَعْدِهِ سَقْطٌ قَدْرِهِ عِنْدِ  
الْمُحْدِثِينَ، هَكَذَا نَقْلُهُ غَيْرُ وَاحِدٍ<sup>44</sup>

Maksudnya : Palsu. Al-Imam Ahmad meriwayatkannya dalam musnadnya. Ia termasuk dalam senarai beberapa hadith Musnad Ahmad yang tiada

---

42 Ibn Jauzi, *al-Maudu'at*, 2/13.

43 Lihat: Al-Syaukani, *Al-Fawaid al-Majmu'ah fi al-Ahadith al-Maudu'ah*, 1/401

44 Lihat: 'Abd al-Rahman Al-Hut, *Asna al-Mutalib fi Ahadith Mukhtalaf al-Maratib* 1/181.

*baginya asal (tidak sahih). Sesiapa sahaja meriwayatkannya selepas itu maka akan gugur kedudukannya di sisi ahli hadith. Demikianlah lebih daripada seorang (ahli hadith) menyebutnya.*

Jika ‘Abd al-Rahman bin ‘Auf yang merupakan sahabat Nabi s.a.w yang paling banyak menyumbangkan hartanya pada jalan Allah membantu perjuangan Nabi s.a.w akan merangkak memasuki syurga disebabkan harta kekayaan pedagangannya, bagaimanakah keadaan orang kaya dalam kalangan umat Islam ini?!!

Padahal ‘Abd al-Rahman bin ‘Auf ini dalam sepuluh yang diberikan العشرة المبشرين بالجنة kalangan khabar gembira dengan syurga). Hadith ini jika diterima sebagai sahih akan melemahkan umat Islam untuk berusaha memajukan perusahaan dan peniagaan kerana tokoh terbesar saudagar umat Islam ini ‘Abd al-Rahman bin ‘Auf sendiri terpaksa merangkak ke syurga akibat kekayaannya. Padahal sumbangan harta beliau tiada tolok bandingnya dibandingkan mereka yang datang selepas beliau.

Justeru itu ‘Umar bin Badr al-Musili(meninggal 622H) dalam kitabnya Al-

Mughni 'an al-Hifz wa al-Kitab di bawah tajuk

### ذم الكسب وفتنته المال

(Celaan Terhadap Pekerjaan dan Fitnah Harta) menyebut hadith 'Abd al-Rahman bin 'Auf merangkak memasuki syurga tersebut kemudian mengulas:

قد ورد في ذلك أحاديث: "أَنْ عَبْدَ الرَّحْمَنِ بْنَ عَوْفٍ رَضِيَ اللَّهُ عَنْهُ يُدْخَلُ الْجَنَّةَ حَبْوًا" .. إِلَى  
غير ذلك. قال المصنف: "لَا يَصْحُ فِي هَذَا  
الْبَابِ شَيْءٌ عَنِ النَّبِيِّ صَلَّى اللَّهُ عَلَيْهِ وَسَلَّمَ  
أَعْنِي ذم الكسب".<sup>45</sup>

"Sesungguhnya telah diriwayatkan mengenai hal ini beberapa hadith. Antara "Sesungguhnya 'Abd al-Rahman bin 'Auf memasuki syurga secara merangkak" dan selainnya. Tidak sahih daripada Nabi s.a.w mengenai perkara ini sedikit pun, iaitu mengenai mencela pekerjaan"

Al-Albani juga telah mengulas agak panjang dan padat dengan beberapa hujah yang dipetik dari pelbagai sumber dalam menghukum hadith sebagai palsu dan bercanggah dengan nas-nas Islam sahih yang lain<sup>46</sup>.

45 Dicetak dalam Abu Ishaq al-Huwaini, Junnah al-Murtab bi Naqd al-Mughni 'an al-Hifz wa al-Kitab, 513.

46 Al-Albani, Silsilat al-Ahadith al-Da'ifat wa al-Maudu'at, 14/212.

Contoh lain:

## آخر أربعاء من الشهر يوم نحس مستمر

Maksudnya : Hari rabu terakhir bagi setiap bulan adalah hari nahas yang berterusan.

Ini adalah hadith palsu<sup>47</sup>. Kandungannya menjadikan sesiapa yang percaya ketakutan tanpa sebab dan memandulkan urusan kehidupan. Apatah lagi pada zaman ini di mana kita sengit bersaing dengan orang-orang kafir. Bahkan isi kepalsuan ini menyanggahi realiti yang kita saksikan. Betapa banyak hari rabu akhir bulan datang dan pergi sedangkan kedatangan musibah tidak pernah memilih hari. Ia adalah ketentuan ALLAH s.w.t semata.

Demikian juga hadith palsu:

## من أحب كريمتيه فلا يكتبن بعد العصر

Maksudnya : Sesiapa yang sayangkan kedua matanya, jangan dia menulis selepas 'Asar.

---

<sup>47</sup> Lihat: al-Albani, *Silsilah al-Ahadith al-Da'ifah wa al-Maudu'ah*, 4/88.

Hadith ini tiada asal baginya<sup>48</sup>. Ramai yang terpengaruh dengan hadith ini, lalu meninggalkan tulisan selepas ‘asar padahal tidak memiliki sebarang sanad.

## 7. Menjatuhkan Imej Tokoh-Tokoh Umat

Ada hadith-hadith palsu yang direka oleh golongan yang taksub kepada sesuatu aliran atau tokoh untuk menjatuhkan tokoh aliran yang lain. Ini seperti hadith-hadith Syiah yang menghina para sahabah yang tidak disukai oleh mereka. Demikian juga hadith palsu yang menghina tokoh-tokoh lain seperti hadith palsu yang menghina al-Imam al-Syaf'i r.h.

يكون في أمتي رجل يقال له محمد بن إدريس  
أضر على أمتي من إبليس ويكون في أمتي رجل  
يقال له أبو حنيفة هو سراج أمتي هو سراج أمتي

*Maksudnya : Akan ada di kalangan umatku seorang lelaki yang dipanggil Muhammad bin Idris, dia memberi mudarat kepada umatku lebih daripada iblis. Akan ada*

<sup>48</sup> Lihat: ‘Ali al-Qari, *al-Masnu’ fi Ma’rifah al-Hadith al-Maudu’*, 1/176.

pula seorang lelaki di kalangan umatku dipanggil Abu Hanifah, dia adalah lampu umatku, dia adalah lampu umatku.

Hadith ini direka oleh Makmun bin Ahmad al-Harawi yang hasad dengan perkembangan pengikut al-Imam al-Syafi'i di Khurasan<sup>49</sup>.

Kata al-Jarahi (w 1162H):

*"Tiada suatu pun hadith saih mengenai pujian atau cercaan terhadap Abu Hanifah dan al-Syafi'i. Semua yang disebut mengenai hal berkenaan adalah palsu lagi dusta"*<sup>50</sup>.

Hadith-hadith palsu seperti di atas dibuat oleh golongan ekstremis mazhab. Ia menjatuhkan maruah umat Islam.

Jika hadith-hadith palsu seperti ini diterima, maka tokoh umat seperti Abu Bakar, 'Umar, 'Uthman, 'Aisyah, Mu'awiyah, 'Amr bin al-'As dan lain-lain akan tercemar. Ini kerana golongan Syiah membenci mereka, maka banyak hadith-hadith palsu direka untuk menjatuhkan kewibawaan mereka.

---

49 Lihat: Al-Sayuti, *Tadrib al-Rawi*, m.s. 182.

50 Al-Jarahi, *Kasyf al-Khafa*, 2/420.

## 8. Memalingkan Manusia Daripada Sunnah Yang Sahih

Dengan mereka mencipta hadith-hadith palsu, akan ada sesetengah golongan yang menumpukan amalan kepada hadith-hadith palsu ini dan meninggalkan sunnah yang sebenar. Ini disebabkan hadith-hadith palsu menjanjikan kelebihan yang luarbiasa. Umpamanya mereka mengajar doa-doa yang palsu.

Kononnya ia diambil daripada nabi-nabi tertentu, di samping disebut pula kelebihan-kelebihan yang banyak yang tidak terdapat dalam hadith sahih. Ibn al-Imam (w. 745H) di dalam kitabnya *Silah al-Mu'min fi al-Du'a wa al-Zikr* سلاح المؤمن في الدعاء والذكر memetik ungkapan al-Qadi Iyadh:

*"Sesungguhnya Allah telah mengizinkan untuk berdo'a kepadaNya. Dia mengajar do'a di dalam kitabNya kepada hamba-hambaNya. Nabi S.A.W pula mengajar do'a kepada umat baginda. Dalam do'a-do'a tersebut mengandungi tiga unsur, iaitu; ilmu mengenai tauhid, ilmu mengenai bahasa dan nasihat kepada umat. Maka tidak wajar bagi seseorang berpaling*

*daripada do`a-do`a baginda S.A.W. Syaitan telah menipu manusia dalam hal ini, lalu dia telah mewujudkan untuk mereka satu puak yang jahat<sup>51</sup>. Lantas mereka mencipta secara palsu untuk diri mereka do`a-do`a yang memalingkan mereka daripada mencontohi Nabi s.a.w. Lebih buruk lagi, mereka menyandarkan do`a-do`a tersebut kepada para Nabi dan orang-orang solih, lalu mereka kata: do`a Adam, do`a Nuh, do`a Yunus dan do`a Abi Bakr al-Siddiq r.a.<sup>52</sup>*

Contohnya hadith palsu dibawah yang dikenali dengan hadith *Solat al-Raghaib*<sup>53</sup>:

عن أنس بن مالك-رضي الله عنه- قال: قال رسول الله- صلى الله عليه وسلم -: "رجب شهر الله، وشعبان شهري، ورمضان شهر أمتي...، وما من أحد يصوم يوم الخميس ، أول خميس في رجب ، ثم يصلي فيما بين العشاء والعتمة، يعني ليلة الجمعة، ثنتي عشرة ركعة، يقرأ في كل ركعة فاتحة الكتاب مرة، و {إِنَّا أَنْزَلْنَاهُ فِي لَيْلَةِ الْقَدْرِ } ثلاث مرات

51 Beliau maksudkan puak kerohanian yang mencipta do`a-do`a palsu ini.

52 Ibn al-Imam, *Silah al-Mu'min fi al-Du'a wa al-Zikr*, m.s. 22-23

53 Iaitu solat yang dilakukan pada malam Jumaat pertama bulan Rejab.

و{قُلْ هُوَ اللَّهُ أَحَدٌ} اثنتي عشرة مرّة ، يفصل بين كل ركعتين بتسليمه ، فإذا فرغ من صلاته صلى على سبعين مرّة...والذي نفسي بيده ما من عبد ولا أمّة صلى هذه الصلاة، إِلَّا غفر اللَّهُ تَعَالَى لَهُ جمِيع ذنوبه ، وإن كانت مثل زيد البحر ، وعدد ورق الأشجار ، وشفع يوم القيمة في سبعمائة من أهل بيته...<sup>54</sup>

Maksudnya : Dari pada Anas bin Malik r.a: Rasulullah s.a.w bersabda: "Bulan Rejab bulan Allah , bulan Sya'ban bulanku , bulan Ramadhan bulan umatku" ..sehingga sabdanya "tidak seseorang pun yang berpuasa pada hari Khamis yang pertama dalam bulan Rejab , kemudian ia bersolat pada malam Jumaat antara waktu isyak 12

---

54 Hadith palsu ini panjang. Di atas adalah potongan-potongan gannya.. Amalan dan hadith palsu ini digalakkan dan disebut di dalam *Ihya 'Ulum al-Din*. Al-Hafiz Zain al-Din al-'Iraqi (wafat 806H) ketika mentakhrikan *Al-Ihya* telah memberitahu kepalsuan hadith ini. (lihat: Al-Ghazali, *Ihya 'Ulum al-Din*, takhrij Al-Hafiz Zain al-Din al-'Iraqi, 1/268). Bersangka baik kepada al-Imam al-Ghazali dengan menganggap beliau tidak mengetahui hadith ini palsu. Ini kerana beliau bukan ahli dalam bidang hadith seperti yang dinyatakan oleh tokoh-tokoh ulama hadith.

rakaat, dia membaca bagi setiap rakaat al-Fatihah sekali, surah al-Qadar 3 kali dan Surah al-Ikhlas dua belas kali. Memberi salam setiap dua rakaat. Apabila selesai dia berselawat ke atasku 70 kali...kecuali Allah akan mengampuni kesemua dosanya sekalipun dosanya seperti buih dilaut dan sebanyak daun-daun pohon kayu serta diberi syafa'at pada hari kiamat sebanyak 700 dari ahli bait... (sehingga akhir hadith).

Hadith palsu ini telah menyebabkan orang ramai tidak menghormati hadith yang sahih di mana baginda s.a.w melarang mengkhususkan malam Jumaat dengan sesuatu solat:

عَنْ أَبِي هُرَيْرَةَ رَضِيَ اللَّهُ عَنْهُ عَنِ النَّبِيِّ صَلَّى اللَّهُ عَلَيْهِ وَسَلَّمَ قَالَ: لَا تَخْتَصُوا لَيْلَةَ الْجُمُعَةِ بِقِيَامٍ مِّنْ بَيْنِ اللَّيَالِي وَلَا تَخْصُوا يَوْمَ الْجُمُعَةِ بِصِيَامٍ مِّنْ بَيْنِ الْأَيَّامِ إِلَّا أَنْ يَكُونَ فِي صَوْمٍ يَصُومُهُ أَحَدُكُمْ

Maksudnya : Daripada Abi Hurairah r.a, daripada Nabi s.a.w, baginda bersabda: "Jangan kamu mengkhususkan malam Jumaat dengan solat yang berbeza

dengan malam-malam yang lain. Jangan kamu mengkhususkan hari Jumaat dengan puasa yang berbeza dengan hari-hari yang lain, kecuali ia dalam (bilangan hari) puasa yang seseorang kamu berpuasa.

Kata al-Imam al-Nawawi (w. 676H):

"Pada hadith ini larangan yang nyata mengkhususkan malam Jumaat dengan sesuatu solat yang tiada dengan malam-malam yang lain dan puasa pada siangnya seperti yang telah dinyatakan. Sepakat para ulama kemakruhannya. Para ulama berhujah dengan hadith ini mengenai kesalahan solat bid'ah yang dinamakan solat al-Raghaib. Semoga Allah memusnahkan pemalsu dan pereka solat ini. Ini kerana sesungguhnya ia adalah bid'ah yang munkar daripada jenis bid'ah yang sesat dan jahil. Padanya kemunkaran yang nyata. Sesungguhnya sejumlah para ulama telah mengarang karangan yang berharga begitu banyak dalam memburukkan dan menghukum sesat orang menuai solat tersebut dan perekanya. Para ulama telah

menyebut dalil-dalil keburukan dan kebatilannya dan kesesatan pembuatnya”<sup>55</sup>.

Hal ini banyak berlaku dalam masyarakat yang menyebabkan mereka meninggalkan hadith sahih kerana terpengaruh dengan hadith palsu.

## 9. Menghilangkan Ketulenan Agama

Tokok tambah ini mendatangkan bidaah yang merosakkan nilai agama. Sedangkan agama rekaan adalah ditolak di sisi Allah. Kata al-Syeikh Abu Syahbah:

*“Antara kesan buruk hadith palsu ialah bertambah banyak dan melariskan bidaah. Kebanyakannya bidaah didapati berpunca dari hadith-hadith palsu. Ini seperti bidaah al-kharqah al-Sufiyyah (pakaian koyak rabak) yang dipakai oleh golongan sufi kerana berpegang dengan hadith-hadith yang dibantah oleh seluruh para ulama”<sup>56</sup>.*

---

55 Al-Nawawi, *Syarh Sahih Muslim*, 3/211.

56 Abu Syahbah, *al-Wasit fi `Ulum wa al-Mustalah al-Hadith*, m.s. 341-342.

Kata Abu al-Hasan 'Ali al-Nadwi:

"Halangan-halangan syirik, kejahilan dan kesesatan hampir menutupi tauhid Islam yang bersih. Maka masuk ke dalam sistem agama bid'ah-bid'ah yang mengambil tempat yang luas dalam kehidupan muslimin dan ia memalingkan mereka dari agama yang sahih dan kehidupan dunia. Sedangkan keistimewaan dan kelebihan muslimin dibandingkan umat-umat yang di dunia ini hanyalah disebabkan agama ini, yang dibawa oleh Muhammad s.a.w. Keistimewaan dan mukjizat agama ini pula ialah pada kesahihan dan keasliannya. Ia menjadi istimewa kerana ia wahyu Allah dan syariatNya. Yang mencipta peraturannya (agama ini) ialah Tuhan Tidak Dapat Dicabar, dan yang membuat syariatnya ialah Tuhan Yang Maha Bijaksana <sup>57</sup> تَنْزِيلٌ مِّنْ حَكِيمٍ حَمِيدٍ). Apabila akal, perbuatan dan hawa nafsu manusia masuk ke dalam agama ini, maka tiada lagi kelebihannya ke atas agama-agama lain yang diselewengkan oleh pengikut agama-

---

<sup>57</sup> Surah Fussilat: 42. maksudnya: Ia diturunkan dari Tuhan Yang Maha Bijaksana, lagi Maha Terpuji.

*agama itu dan peraturan yang ditetapkan oleh tangan manusia, melainkan dengan kadar wahyu yang masih tinggal terpelihara padanya. Tidak lagi menjadi penjamin penjamin kebahagiaan dunia dan akhirat dan tidak lagi benar-benar menundukkan akal dan menarik manusia kepadanya*<sup>58</sup>.

Kata al-Sayyid Sulaiman al-Nadwi:

*"Sesungguhnya sirah yang berhak diikuti oleh manusia sebagai contoh yang baik dan teladan yang tinggi disyaratkan terlebih dahulu mestilah bersifat tarikhiiyah (sejarah). Adapun sirah yang tertegak atas dongengan dan cerita-cerita khurafat yang tidak disokong oleh riwayat-riwayat yang dipercayai kesahihannya, maka menjadi tabiat insan tidak akan terpengaruh dengan apa yang diceritakan kepadanya tentang sirah peribadi yang direka sedangkan sejarah tidak pernah mengenalinya*<sup>59</sup>.

---

58 Abu al-Hasan al-Nadwi, *Madha Khasira al-'Alam bi Inhitat al-Muslimin*, m.s. 195.

59 Sulaiman al-Nadwi, *al-Risalah al-Muhammadiyah*, m.s. 41.

## **Penutup**

Jelas sekali hadith palsu adalah suatu ancaman terhadap agama. Ia mencemarkan imej Islam yang murni dan kukuh. Pembendungan hadith-hadith palsu adalah tanggungjawab agama yang mesti dipikul oleh setiap sarjana dan pencinta Islam yang tulen.

## Senarai Rujukan

1. 'Abd al-Rahman Al-Hut, *Asna al-Matalib fi Ahadith Mukhtalaf al-Maratib*. Beirut: Dar al-Kutub al-'Ilmiyyah (1997).
2. 'Abd al-Rahman bin 'Ali al-Jauzi, *al-Maudu'at*, Madinah: al-Maktabah al-Salafiyyah (1968)
3. 'Ali al-Qari, *al-Masnu' fi Ma'rifat al-Hadith al-Maudu'*. Riyadh: Maktabah al-Rusyd (1404H).
4. Abu al-Hasan al-Nadwi, *Madha Khasira al-'Alam bi Inhitat al-Muslimin*, Kaherah: Maktabat al-Sunnat (1990)
5. Abu Ghuddah, 'Abd al-Fattah Zafar al-Amani, Damsyik: Maktab al-Matbu`at al-Islamiyyah (1416H)
6. Abu Ishaq al-Huwaini, *Junnah al-Murtab bi Naqd al-Mughni 'an al-Hifz wa al-Kitab*, Beirut: Dar al-Kitab al-'Arabi (1994)
7. Abu Syahbah, *al-Wasit fi 'Ulum wa al-Mustalah al-Hadith*, Kaherah: Dar al-Fikr al-'Arabi (t.t)
8. Abu Syahbah, *Difa' 'An al-Sunnah*, Kaherah: Maktabah al-Sunnat (1989)

9. al-Albani, *Sahih Sunan Ibn Majah*. Riyadh: Maktab al-Tarbiyyah al-'Arabi (1988).
10. Al-Albani, *Silsilat al-Ahadith al-Da'ifat wa al-Maudu'at*, Riyad: Maktab al-Ma'arif (1992)
11. Al-Bukhari, Muhammad bin Ismail. *Sahih al-Bukhari*. Beirut: Dar Ibn Kathir. (1986)
12. al-Dhahabi, *al-Muqizah fi 'ilm al-Mustalah al-Hadith*, Syria: al-Matbu`at al-Islamiyyah (1992)
13. Al-Dhahabi, *Siyar A'lam al-Nubala*, Beirut: Muassasah al-Risalat (2001).
14. Al-Ghazali, *Ihya 'Ulum al-Din*, takhrij Al-Hafiz Zain al-Din al-'Iraqi, Damsyik: Dar al-Khair (1990)
15. Al-Jarrahi, Isma'il bin Muhammad *Kasyf al-Khafa'* Beirut: Dar Ihya al-Tutath al-'Arabi. (1351H)
16. Al-Nawawi, Muhyi al-Din bin Zakariya. *Syarh Sahih Muslim*. Beirut: Dar al-Khair. (1414H).
17. Al-Qasimi, *Qawa'id al-Tahdith*, Beirut: Dar al-Nafais (1993)
18. Al-Sayuti, *al-Lali al-Masnu'ah fi al-Ahadith al-Maudu'ah*, Beirut: Dar al-Kutub al-'Ilmiyyah (1996).
19. Al-Sayuti, *Tadrib al-Rawi*, Beirut: Dar al-Fikr (1993).

20. Al-Syaukani, *Al-Fawa'id al-Majmu'ah fi al-Ahadith al-Maudu'ah*, Beirut: Dar al-Kutub al-'Ilmiyyah (t.t)
21. Hammam, Sa'id, *Al-Tamhid fi 'Ulum al-Hadith*, Jordan: Dar al-Furqan (1988).
22. Ibn 'Adi al-Jurjani, *Al-Kamil fi Du'afaa al-Rijal*, Beirut: Dar al-Fikr (1988).
23. Ibn Abi Nu'aim, *Hilyat al-Auliya*, Beirut: Dar al-Kutub al-'Arabi (1405H).
24. Ibn al-Imam, *Silah al-Mu'min fi al-Du'a wa al-Zikr* Dar al-Kalim al-Tayyib, Damsyik (1994).
25. Ibn al-Salah, *'Ulum al-Hadith*, Beirut, Dar al-Fikr al-Mu'asarat (1986).
26. Ibn Hajar al-'Asqalani, *Lisan al-Mizan*, Beirut: Muassasah al-'Ilm li al-Matbu'at (1986).
27. Ibn Hajar al-'Asqalani, *Al-Isabat fi Tamyiz al-Sahabah*, 1/121, Beirut: Dar al-Kutub al-'Ilmiyyat (1992).
28. Ibn Hajar al-'Asqalani, Ahmad bin 'Ali. *Fath al-Bari bi Syarh Sahih al-Bukhari..* Beirut: Dar al-Fikr (1993).
29. Ibn Hibban, *Sahih Ibn Hibban*, Beirut: Muasasat al-Risalat. (1993).

30. Ibn Hajar al-‘Asqalani, *Al-Talkhis al-Habir fi Takhrij Ahadith al-Rafi'i al-Kabir*, Kaherah: Muassasah Qurtubah (1995).
31. Ibn Majah: Muhammad bin Yazid, *Al-Sunan*, tahqiq: Muhammad Fuad ‘Abd al-Baqi, Beirut: Dar al-Fikr (t.t.).
32. Ibn Qayyim al-Jauziyyat, *al-Manar al-Munif fi al-Sahih wa al-Da'if*, Syria: Maktab al-Matbu`at al-Islamiyyat (1994).
33. Muslim, Muslim bin al-Hajjaj *Sahih Muslim*. Beirut: Dar Ihya al-Turath al-‘Arabi.(t.t)
34. Nasir al-Din al-Albani, *Silsilat al-Ahadith al-Da'ifat wa al-Maudu'at*, Riyad: Maktab al-Ma'arif (1992).
35. Nur al-Din 'Itr, *Manhaj al-Naqd fi 'Ulum al-Hadith*, Damsyik: Dar al-Fikr (1992).
36. Sulaiman al-Nadwi, *al-Risalat al-Muhammadiyyat*, Riyadh: Dar al-Sa`udiyyah (1404H)

# HADITH PALSU

KESAN NEGATIF  
TERHADAP IMEJ ISLAM

HADITH PALSU ADALAH SUATU ANCAMAN TERHADAP AGAMA. IA MENCEMARKAN IMEJ ISLAM YANG MURNI DAN KUKUH. PEMBENDUNGAN HADITH-HADITH PALSU ADALAH TANGGUNGJAWAB AGAMA YANG MESTI DIPIKUL OLEH SETIAP SARJANA DAN PENCINTA ISLAM YANG TULEN.